



Umhverfis- og auðlindaráðuneytið
Skuggasundi 1

101 REYKJAVÍK
postur@uar.is

Reykjavík, 22.10.2018
Tilvísun vor: M-2018-195 / 00.11

Efni: Frumvarp á 149. þingi – loftslagslög

Vísað er til máls nr. S-138/2018 í Samráðsgáttinni þar sem kynnt eru áform umhverfis- og auðlindaráðherra um að leggja fram frumvarp til laga um breytingar á lögum nr. 70/2012 um loftslagsmál. Landsvirkjun hefur kynnt sér gögnin sem birt eru á samráðsgáttinni og þakkar tækifæri til að koma að samráði vegna áformanna.

Landsvirkjun fagnar því að búið er að skipa loftslagsráð og að áform eru um að setja í lög ákvæði um ráðið. Mikilvægt er að hlutverk ráðsins verði skýrt og að þau sem í því munu sitja hafi í senn yfirgripsmikla þekkingu á málefnum, leiðum til að sporna gegn loftslagsáhrifum og möguleikum einstaklinga og atvinnulífs til að draga úr áhrifum sínum. Því er hvatt til að í lögunum verði kveðið á um að fulltrúar atvinnulífs, þ.m.t. orkufyrirtækjanna eða Samorku, eigi sæti í ráðinu og jafnframt að þegar fjallað verður um einstakar atvinnugreinar verði tryggt samráð við fyrirtæki í viðkomandi grein. Með þeim hætti má bæði tryggja að þekking og reynsla fyrirtækjanna gagnist öðrum samtímis því að þau eru virkjuð til beinna aðgerða.

Stefna Landsvirkjunar er að verða kolefnishlutlaus eigi síðar en árið 2030 og er unnið að margvíslegum verkefnum til að það megi takast. Fyrirtækið hefur lagt ríka áherslu á að þekkja losun frá starfseminni og áhrif verkefna sem farið hefur verið í til að binda kolefni. Í því efni hefur fyrirtækið átt gott samstarf bæði við vísindasamfélagið og stofnanir ríkisins. Landsvirkjun var í hópi rúmlega 2.000 fyrirtækja sem undirrituðu sáttmálann *Caring for Climate* í aðdraganda aðildarríkjapings loftslagssamningsins 2015, samhliða skráði fyrirtækið markmið sín hjá NAZCA (*Non-State Actor Zone for Climate Action*). Þá hefur fyrirtækið riðið á vaðið á Íslandi annars vegar með því að gefa út græn skuldabréf og hins vegar með því að ákveða að nota innra kolefnisverð við ákvarðanir um fjárfestingar og rekstur í framtíðinni. Með þeirri ákvörðun mun losun gróðurhúsalofttegunda hafa bein áhrif á starfsemi fyrirtækisins í framtíðinni.

Þá hefur Landsvirkjun í samstarfi við innlenda og erlenda aðila unnið að margvíslegum verkefnum til að meta áhrif loftslagsbreytinga á starfsemi fyrirtækisins og hafa niðurstöður þeirra þegar haft áhrif í reksturinn. Niðurstöður hafa jafnframt verið nýttar á alþjóðavettvangi.

Landsvirkjun er reiðubúin til að deila með ráðinu og öðrum sem áhuga hafa reynslu og þekkingu sem aflað hefur verið.

Virðingarfyllst,

Hörður Arnarson, forstjóri